



Sabtu, 28 Agustus 2021

Ogen: Juna 1:1-17



Tetap I bas Jalur



Adi motor la dalanna dalanina, jumpa cilaka. Adi anak sekolah la ngikuti aturen sekolahna, ngaloken ukumen. Nggeluh enda lit aturen si arus sidalanken. Kalak si la ngikuti aturen jumpa cilaka entah pe ukumen.

Juna isuruh Dibata ku kuta Niniwe guna mpeseh kata persinget i bas Dibata nari. Tujunna segelah jera dengen robah anak kuta e. Ialoken Juna perintah e tapi la ilakokenna. Nilah ia, lawes ia ku kuta sideban, atena lompat i bas Dibata nari. Lit piga-piga kali ikataken i bas ogenta maka lompat ate Juna i bas Tuhan nari (ayat 3a, 3c, 10).

Situhuna Juna la setuju persuruhan Tuhan e. La ia senang adi kalak Niniwe robah ras terkelin. Sura-surana mpediat kalak Niniwe nggeluh i bas kejahatenna, gelah iukum mate. Radas la lit tinadingna. Kalak Niniwe e la erteman ras kalak Juda emaka pangen akap Juna ia iukum saja. Lompat ia i bas Dibata nari erbahanca jumpa ia situasi si la pernah iukurkenna banci jadi. *Sipemena* : ibahan Tuhan angin si meter dengen galumbang si merawa nderpa kapal sinangkihina. Ngatakenca Dibata banci make tinapa guna mpersingeti suruh-suruhanNa segelah mulihken ndahiken dahin si enggo isuruhNa. *Sipeduaken*: make kalak sideban guna mpersingeti suruh-suruhanNa. Angin ras gelombang jadi tapi Juna badeh pertunduhna. La sitik pe gejal-gejal Juna nangdagi si jadi e, emaka ipake Dibata me kapten kapal e guna mpersingetisa. *Sipetelukan* : alu erbahan tikam tanduk. Idat me maka Juna si salah janah ipatpati, payo nge erkiteken kesalahenna maka jadi sie kerina. Ngaku dengen sadar si Juna nina: ambekken aku ku lawit maka tenang ka mulihi.

Banci si idah ulihna adi nilah i bas persuruhan Dibata. Perintah Tuhan eme jalur kegeluhenta, dalanilah, lakokenlah sabap kerina e maba keselamatanen.